

Chhuah fan : October 1984

RAMTHAR

JUNE



2026



LONGNIT BORJAN KOHHRAN BIAK IN **Karbi Anglong Mission Field**

SERMON

Biak ina inkhâwm

Phêk

3-7

KUM 42-NA

JUNE 2026

BU 484

RAMTHAR ASSOCIATION CHANCHIN BU THLA KIP CHHUAK

EDITORIAL BOARD 2025 - 2027

Editor

Rev. Dr. C. Chawngmngliana

Joint Editors

Pu Albert Lalhmangaiha

T. Upa T. Lalchhuangliana

News Editor

Tv. Lalringgheta

Circulation Manager

Pu Lallawmnakima Hmar

Publisher

Rev. R. Lalhmingsanga

Member-te

Rev. John Raldosanga

Synod Moderator

Rev. B. Zohmangaiha

Synod Secretary (Sr.)

Rev. Dr. Rosiamliana Tochhawng

Executive Secy., i/c Mission

Upa C. Lalmalsawma

BEC Member

Upa S. Lalthanga

BEC Member

SYNOD MISSION BOARD HOUTUTE

Rev. Dr. Rosiamliana Tochhawng

Executive Secretary

Rev. R. Lalhmingsanga

Secretary

Pu Albert Lalhmangaiha

Coordinator

Ramthar lâk chungchângah leh thu chhuah chungchângah
hêngahte hian biak pawh theih kan ni e:

Mobile No: 8974694225 (WhatsApp/Telegram)

Email: ramtharchanchinbu@gmail.com

KUM KHAT LÂK MAN - ₹ 60/-

A CHHUNGA THU AWMTE

1. Editor thukhawchâng	1
2. Keimahni	2
3. Sermon	3-7
4. BUH HMUN AṬANGIN:	8-16
(1) Longnit Borjan khuaa rawngbâwlina	
(2) Solomile khuaa rawngbâwlina	
(3) Jampuijala lam ve thung	
5. Home Mission North-ah kâr khat	17-21
6. Jehova Jire	22-24
7. Ramthar Feh	25-32



PENTIKOS KÛT LEH RINGTUTE



Pentikos tih hi Grîk ɣawng a ni a, **sawmngana** tihna a ni. Israel-ho kût pawimawh tak a ni. Israel-ho zîngah chuan he kût hi ‘Chawlhkâr Kût’, ‘Buh seng Kût’, ‘Buh thar tîrh Kût’ ti tein an lo sawi ɣhîn. Puithiamte chhût dân chuan Kalhlên Kût zawha sabath ni hmasa ber aɣanga chhûta chawlhkâr sarihna emaw, ni sawmngana emaw-ah hman ɣhîn a ni. Thuthlung Thar hunah chuan Isua thawhleh hnu ni 50-naah (Pentikos Ni-ah) Jerusalem khuua ringtu pung khâwmho zîngah Thlarau Thianghlim a lo thleng a, heta ɣang hian Thlarau Thianghlim thlenna ni-ah hman ɣan a ni ta a. Pentikos Ni-a ringtute zînga Thlarau Thianghlim a lo thlen khân thil chhinchhiah tûr hrang hrang a awm, pakhat chauh sawi ila: *‘An zain hmun khatah an awm khâwm vek.’*

Hmun khatah, rilru hmun khatin an awm khâwm vek a, ɣhahnemngai takin an ɣawngɣai a, thâwklehkhatah Thlarau Thianghlim chu a lo thleng ta a nih kha! An awm khâwmna hmun hi khawi lai nge tih sawi a awm lo. Mahse, hmun khatah an awm khâwm vek si. Tûnlai ni ta se la, ringtute awm khâwmna chu biak in a ni ngei ang. An zavaiin an inkhâwm vek a nih hmêl. Tûnlai hian inkhâwm hi kan va peih lo ta êm! Thlarau Thianghlim ko êih tûr khawp hian hmun khatah, rilru hmun khatin kan awm khâwm ve em? Chutianga rilru hmun khat pua, hmun khata awm khâwma, ɣhahnemngai taka ɣawngɣaina chuan Thlarau Thianghlim a au êih ɣhîn. Ringtu hmasate zînga Thlarau thianghlim lo thlen laia rilru hmun khata an awm khâwm khân an inpumkhatzia a târ lang. ‘Chu inpumkhatna ɣha tak chuan Thlarau Thianghlim a ko thla,’ pawh kan ti thei ang. American mi, mit del, beng ngawng, lehkhabu 14 lai ziaktu Hellen Keller-in, *“Mahni chuan thil beitham tê chauh kan ti thei a, kan ɣan rual chuan thil tam tak kan ti thei a ni,”* a tih hi ringtute tân zirlai ropui tak a ni.



KEIMAHNI**† TUARPUINA:**

(1) Pi Chalzawni (70), Ramlaitui, Pi Lalchhanchhuahi, Evangelist Teacher, Damparengpui (Home Mission North) nu chu ni 30.4.2026 khân cancer vângin a thi.

(2) Pu Lalbiakthanga (71), Mualcheng, Pu Lalzarzova, Evangelist, ITI Veng (Masihi Sangati) pa chu ni 4.5.2026 khân cancer vângin a thi.

(3) Pu Saithangluaia (90), Rengdîl Hmunṭha, Pu Lalvenpuia, Evangelist, Kaisanari (Cachar Tlângram) pa chu ni 11.5.2026 khân thisen sâng leh zun thlum vângin a thi.

(4) Pu C. Biakchungnunga (76), Saichal, Pu Lalhmangaihzualla, Evangelist, Nalbari (Assam Mission Field) pa chu ni 17.5.2026 khân *asthma* vângin a thi.

Ramthar Editorial Board-in lu sùn chhûngte a tuarpui tak zet a ni. Pathianin awmpuiin thlamuan rawh se.

† SMB LEH PCK THAWK HO DÂWN: SMB leh Presbyterian Church of Korea te thawh ho chu SEC-in a rem ti a, Synod Partnership Committee-in SMB bawhzui tûrin a dah.

† SMB LEH MAWDEM PRESBYTERY THAWH HONA: SMB leh KJP Synod chhûnga Mawdem Presbytery te thawh hona chu SEC-in tihthar rem tiin, Synod Partnership bawh zui tûrin a dah.

† SMB YOUTUBE CHANNEL & INSTAGRAM:

Synod Mission Board chuan **SYNOD RAMTHAR PALAI** tiin *YouTube Channel* a siam a. Hetah hian missionary te, missionary pensioner te, kohhran hrang hrang ramthar hma lâkna chanchin te, adt. dah a ni a. Hei hi Ramthar rawngbâwlina kawnga kohhranhote leh missionary-te kan intihchak tawna atâna buatsaih a ni a. Lo thlir ṭhîn tûrin kohhranhote kan insâwm e.

Tin, hemi ang tho hian SMB chuan *Instagram account* siamin **Synod Mission Board** tiin dah a ni a. *Instagram* hmang ṭhînte chu lo *follow* (zawm) ṭheuh tûrin kan ngên a ni.





SERMON PATHIAN BIAK INA INKHÂWM

Chhiar tûr: (Lk 4:16).

Rev. Lalduhawma Ralte
i/c Thuampui Pastor Bial
Mobile No: 9436142966



'Inkhâwm, inkhâwm pawh hi eng tihna mah a ni lo,' tih tawngkam hi kan hre tawh ngei ang. Inkhâwm thîn pawh eng mah an nih loh chuan inkhâwm ngai lo phei chu engtin tak ni ang maw! Isua chanchin kan hriat chin ațanga hemi chungchânga kan ngaihtuah zui tûrte han sawi zui dâwn teh ang.

Thân lenpui: Isua hian a têt lai ațanga a tih thán chu inkhâwmna ina kal thîn hi a ni tih Bible châng târ lan ațang hian a chiang hle. A chhan chu a chanchin ziaktu Luka hian, *'Chawlnhia a tih dân pangngaiin inkhâwmna inah a lût a,'* a ti kher tlat a ni. Mi ti kher kherte zârah Isua nungchang kan lo hriat chian phah thei hi a hlu hle mai. Tih dân nghet tak a nunpui chu inkhâwm huna inkhâwm mai thîn hi a ni. A thisenah a thán lenpui tih a hriat theih âwm e. Hetah hian a chhûngte - a nu leh pate rinna pawh eng emaw chen chu a suangtuah zui theih hial ang.

Rinna pawh hi thán hnan theih thil a ni âwm asin le. Entawn tûr a hnutchhiah ța khawp asin. Pathian thûin, *'Naupang chu a kalna awm kawngah chuan zirtîr ula, a upat hun pawhin a thlah lo vang,'* (Thuf 22:6) a tih hi a lo dik hle mai.

Tui mal far: Hla thûin, *'Tui mal far tê tê, ȳauvut hrang awm khâwm, Tuipui lian a thlenin ram nuam a lo awm,'* a ti. A dik hle mai. Puitling ni tûr hian nu hnute hnêk lai ațanga puitlin thleng hian taksa mamawh chaw ei a ngai. Eng hun lai emaw bika ei avânga thang lian leh

chak ta bîk a nih ngawt theih loh. Miin a mamawh a ei, a tui leh tui lêm lo thleng hian taksa ðan len nân an pawimawh vek mai. Chutiang bawkin rinna lama ðan len nân vawi hnih khat ngaihthlâk emaw, chhiar emaw avânga ringtu puitling ta riau, tla fâl thei, rin tlâk a nih ngawt theih loh. Ringtu puitling nihna kawngah hian miin a lo khâwl khâwm, a ei aţanga lo ðang lian zêlin a lo puitling zâwk ðin a ni.

Isua Krista pawhin a têt lai ata he puitlinna kawng hi a zawh ve ngei tih Bible aţang hian a hmuh theih. Kum sawmpahnih emaw chauh a nih lai pawhin Jerusalem Temple-ah a inkhâwm a ni (Lk 2:41ff). A chanchin ziaktute hian an ziak kim lo nachungin Pathian thua enkawl sei len leh zirtîr a ni tih hi a Chiang viau mai. A thisenah Pathian thu chhiar, ðawngtai leh inkhâwm hi a ðan lenpui Chiang hle mai. Chawlhnia Pathian be tûra amah biakna hmun ngeia kal hi a nunah a bet tlat tawh.

www.mizoramsynod.org

Thil ða lo a inkai chhâwn theih ang bawkin thil ða pawh a inhlan chhâwn theih ngei e.

Khawi hmun aţang pawha biak: Inkhâwm ngaina vak loten, '*Pathian chu hmun tina awm leh biak theih a ni alâwm, a hranpaa biak inah kher biak tum a tûl lo,*' an ti fo mai. An sawi dik ve fû mai. Pathian hi biak inah chauh lo pawh biak theih leh pâwl theih a ni ngei mai. Dik tak chuan biak inah, inthunun ngaihna hnuaia inkhâwm ai chuan mahni in lum aţanga zalên tak chung a biak te hi a hahdam thlâk fê zâwk alâwm.

Tûnlai tih dân thar, mahni in lum aţanga TV-a lo en theih hi a va ða êm! '*Mahni ina inkhâwm zêl mai te hi a ða viau zâwk lâwm ni? Miin thu hriltu a duh zâwng tak thu sawi a ngaithla thei a, a hlâwk viau zâwk mai lo vem ni? Tin, biak ina thu hriltu hril thiam vak lo ngaihthlâk ai chuan a ða phian lo maw?*' tih rilru hi a awm thei ngei ang.

Isua ngei pawh khân dik tak chuan biak in pan kher lo khân Lalpa Pathian chu a pâwl thei lutuk. Mihringte angin Pathian kha a biak hranpa pawh ngai lovin a awm thei êm êm ang. Chuti chung chuan a hun laia inkhâwm hun bî leh a hmun kha a ngai pawimawh tlat mai. Chuti chungin a mangan ve êm êm zânah khân Gethsemani huanah a tawngtai leh tlat lawi si! Hei pawh hi Chanchin Tha ziaaktu Luka chuan, “Tin, ani chu a chhuak a, a dân pangngaiin Oliv tlângah chuan a kal ta a; zirtirte pawhin an zui a. Tin, a hmun chu a va thlen chuan an hnênah, ‘Thlemnaa in luh loh nân tawngtai rawh u,’ a ti a,” tiin a ziaak (Lk 22:39,40).

Hei hian Pathian pâwlina hmun hi hmun pakhatah chauh biak tûr a ni lo tih a hriat theih âwm e. Keini pawhin Lalpa hi khawi hmun aţang pawhin kan be thei ngei ang chu. Isuan a hmang kawp thiam ang hian ringtute hian hmang thiam ve zêl ila, a va t̃ha dâwn êm!

www.mizoramsynod.org

Biak inah chauh maw?

Eng vângin nge Isua Krista khân Pathian biakna hmun kher chu a lo tlawh fo chu le? Berâm, ran azawnga ran nun nêmh leh hlauhawm lo ber mai pawh hi a huhova an awm khâwm chuan chinghnia, sihal leh sakei te meuh pawhin zuk han seh ngai hauh lo va. A huho aţanga tla fâl leh kal hrang bawh hi a ni an seh t̃hin ni. An chakna chu a rual emaw, a huho emawa awm kha a ni. Mei pawh hi thingfâk khat emaw chauh chuan a alh t̃ha thei t̃hin lo. A tam tham deuh tuah erawh chuan amahin a alh hlauh hlauh si t̃hin.

Kan Pathian hian ringtute, mahni awm awma awma, darh sarh nuai maia awm tûr hian a beisei chiah lo a nih hmêl khop mai. Kristian rinna chu ‘*Huhô Rinna*’ a ni. Biak ina inkhâwm hi rinna lama intihchakna pawimawh tak pakhat a ni tlat. A huhova awm chu hmêlma pawhin an hlau nge nge t̃hin. Mi mal, chhûngkuaa Pathian biak a ngai ta hi fiahna

hun a ni. Mal tlat nuna chak tûrin a huhova intihchak tawnna hmun tlawh fo a ngai tlat alâwm. Chuvâng tak chuan alâwm a huhova amah biakna tûr hmun a lo buatsaihsak chu le!

Hindu-ho rinna chu mahnia rau veng veng, a tâwpa zalênna hmuh tumna a ni ber mai. Chuvângin, an puithiamte pawh mahni in thingbuk hnuaiah an in sawr bing a, an mi mal thlarau mîna chuan mi dang a kêp tel ve lêm lo. Tuifinriat tuipui zau taka pen tui far khat tuipui tuiin a lo pawlh dal zo veka, pen tuiin a nihna a hloh ta ang mai hi an rinna chu a ni. Chutiang rinna nei tân huhova tih a tûlna a awm lo. Mahnia thlarau mî kha a tâwk viau!

Kristian rinna ve thung erawh chu mahni chauhvah thlarau chan leh chhandamna chan ngawr ngawr hi a ni ve ngawt lo. Chhandamna chu mi zawng zawng huapa inzirtîr thin a ni zâwk. Chu chhandamna chang tûr chuan mahni hma sial tak chung

chan tumna a awm lo. Krista chhandamnarawn thawh chhuah hi mi zawng zawng tân a ni. Huho chhandamna, huhova Pathian biakna leh huho chhandamna a ni. Pathian bîa inkhâwm thînte hi hmuh famkim tum an awl khawp mai. Mahse, famkim loh avâng taka Lalpa hmaa kal thin an ni mah zâwk si ang. A tehna sâng tak hian Pathian biak ina kal hlutna a lantîr Chiang khawp a ni. Famkim tawh avâng inkhâwm an awm thei baw si lo vang.

Chakna a ni: Ringtu chuan hêng mi mal, chhûngkua leh biak ina than lenna chaw a ei thin aţangin ringtu puitlinna kawng a zawh thin. A pawimawh zâwk emaw, pawimawh ber emaw a sawi theih kher lo vang. A pathum hian an pawimawh theuh zâwk a ni. An ţang ho za tûr a ni a, an pathum hian an inchâwm tawn zâwk thin. Bible vên, *‘Hrui thum hrual chu a chat lawk lawk ngai lo ve,’* (Thuhriltu 4:12) a lo ti rêng a ni. Hemia châwm

puitin ringtu chu a danglam
ngê ngê thîn.

Sam ziaktu chuan,
'Chakna aṭangin chak leh-
zualnaah an kal ṭhîn a, Zion-

ah Pathian hmaah chuan an
inlan ṭheuh ṭhîn,' (Sam 84:7)
a ti. Pathian biak inah Lalpa
chu fak leh chawimawiin lo
awm zêl rawh se. Kohhran
tân chakna a ni si a.



Vawi khat chu pa pakhat leh
a fapa naupang tē hi thlasik khaw
vâwt takah hian kawngah an kal dūn
a. A fapa chuan jacket lum nuam
tak mai hain, a kut khing hnih chuan
a iptē a zen a. A pa chuan, "*A nâl si
a, ka lo kai ang che,*" a ti a; ani
chuan a lo duh lo va. Kawng nâlah
chuan a tawlh thlu ta zawt mai a. A
pa lam chu enin, "*A nih leh i kut ka
lo vuan ang,*" tiin, a pa kut chu a
vuan ta a. Kawng nâl dang an thlen
leh chuan a vawna chu a pît a, a
tlu leh ta zawt mai a. A pa hnênah chuan, "*Nangman min
vuan zâwk mai rawh aw,*" tiin a kut chuan a han ban a, a pa
chuan nghet tak maiin a lo chelh a. Kawng nâl an thlen apiang
chuan a pa chuan zo tak mai hian a chelh a, tlu lovin an tum
hmun an thleng thei ta a ni.

I mamawh hunah, i duh tâwk chinah chauh Pathian i
pan chuan amah pan tûra chakna i neih loh vêleh i chauvin, i
tlu zêl ang. Pathian hi i tâna nuntîr tum lovin, Pathian tân
zâwk nung la, amah zâwkin nghet takin a chelh ang che.

***"Kei Lalpa in Pathian hian, 'Hlau suh u, ka ṭanpui dâwn a
che u,' tiin in kut dîng lam chu ka chelh dâwn si a,"***

(Isaia 41:13).

BUH HMUN AṬANGIN LONGNIT BORJAN KHUAA RAWNGBÂWLNA

*Lalrinsangi, Health Worker
Longnit Borjan, Karbi Anglong
Mobile No: 80116 10023*



Tûn tuma rawngbâwlna chanchin kan târ lan tûr hi Longnit Borjan-a tihdam rawngbâwlna kan kalpui dân a ni dân a. Kan sawi tan tak tak hmain a hmunhmâ awm dân te han thai lang hmasa ila. Longnit Borjan hi Karbi Anglong *district* huam chhûnga awm a ni a. Assam state chhûngah Karbi Anglong hi *Autonomous Council*-in an awm a, district lian tak mai a ni a, mihring chêng pawh chhiarpui hnuhnung berah mi 11,44,400 vêl an awm anga chhût a ni. A ram zau zâwng hi 10, 434sq km laia lian a ni. Ziak leh chhiar thiam hi 69.25% vêl an ni. Kristian hi 16.50% vêl chauh an ni a, a bâk zawng hi ringlo - Honghari, Hindu, Muslim, Buddhist, Aron Kimi te an ni.

Karbi Anglong-ah hian hnam hrang hrang an chêng a, a ram neitu Karbi-ho bâkah hian hnam hrang hrang 10-14 vêl an awm. Longnit Borjan hi Pastor Bial thut-hmun a ni a. Karbi Anglong Presbyterian Church Synod chu a piang tawh a; amahe-rawhchu, Mizoram Synod nênthawh dunna thuthlung hi chu an la ziak ve zêl a ni. A ram hi a lum êm êm a, a vawhin a vâwt leh êm êm a.

A lumzia hi chu sawi ngai vak lo pawhin Mizoram lam aṭanga tlawhtu kan neihte hian kan *quarters*-a fan awm zât aṭangin a lum dân tûr hi min chhûtpui thiam mai thîn a ni. He lamah hi chuan hêng bial inkhâwmpui te, Presbytery te, Synod inkhâwmpui thlengin January - March thla chhûng-in kan zo hman vek zêl a ni.

A mi chêngte: Karbi hnam hi leileta ei zawng an

ni deuh ber a, an awmna ram hi phaizâwl a tam avâng hian lei te letin buh an chîng deuh ber a, tlâng ram lamah chuan lo an nei thung. Kut hna thawka ei zawng hi a tam zâwk an la ni a. A ram leilung hi a thain a rualrem êm êm a, leilet an neih theih tawh chuan buhah an intodelh thei tlâng-pui thîn. Khawtlângah lal neia khawsa an la ni a, ‘*Gaunbura*’ tiin an sawi mai thîn a, an *gaunbura* te chuan *area* tê tê an nei a. A khaw len dân azirin khaw khatah *gaunbura* pahnih pathum leh a aia tam te pawh an awm thei.

An sakhaw lam: Sakhaw lamah hian an nghet viau. Dam lohna an tawh hian damna zawngin inthâwina chi hrang hrang an nei nasa thîn hle a, sum pawh an hmang nasa thei hle thîn a, an neih zawng zawng an hman ral châng pawh a awm thîn. Chutianga an dam mai loh chuan ringtua inpêk pawh an awlsam phah thîn a, damna duh êm avâng hian a tâwp khâwka ringtu rawn nite pawh an awm châwk thîn.

www.mizoramsynod.org

Kristian dodâlna hi chuti êm êm chuan a nasa lo. Kristiante chu engkima fel famkim tûra ngaihna an nei lian hle a, zûah phei chuan fihlîm tûra ngaihna an nei lian hle a, Kristiante tih tûrah an ngai lo.

Kristianna chung-châng: Karbi ram hian Chanchin Tha hi Mizoram aiin a dawng hmasa zâwk a, an hmêl hriatna a rei tawh zâwk a ni. Chanchin Tha an dawwna hi rei ve tawh viau mah sela Kristian *percentage* a sâng chak thei lo hle. Ringtharte hian khua ațanga hnawh chhuah te an tâwk fo va, ‘*Ringtua in inpêk chuan...*’ tia vaukhânna tâwk chhûngkuate pawh an awm thîn. Chutianga ensan leh hnawh chhuah te awm thîn mah sela thawktute lam hi chu dodâlna tâwk an la awm hran lo a ni.

Medical rawngbâwlna tlângpui: Tihdam rawngbâwlna lamah hian theih tâwp chhuahin kan thawk ve thîn a. Kan rawngbâwlna mite hian damdawi ina awm rei te hi

an hlau êm êm thîn a. Han inentîr ve thîn mah se damdawi ina in-*admit* ai chuan mahni in lama damdawi inpêk zui ngaiin an lo haw tlângpui thîn a. Chutiang doctor chawh (prescription) sâ hmanga kan lo enkawl chhunzawm kha kan tân pawh a him êm êm a ni. Sum tam tak an sênna tûrah anmahni inah *home nurse* hna kan va thawhsak thîn a. A thenin in lamah minrawn pan a, ringlote pawhin min lo pan châng a awm thîn a. Chûng hun chu remchâng-ah lain, tîtipuia thiana siam nân hun remchâng tak a ni a, a hnu leh zêlah an ina lên luh a awlsam phah hle.

Tihdam rawngbâwl-na hi mi tinin mamawh hun kan neih avâng hian thian siam nân a tângkai hle a ni. Vawi leh khata Pathian thu hril mai te a lo harsa tawh a; an BP te *check*-sak tûra kal chuan min lo dawngsawng tha thîn êm êm a, ringlo inah pawh *medical* rawngbâwl-na hian miin lên luh a tihnaawm phah thîn.

www.mizoramsynod.org

Tum khat chu kan kohhran nu pakhat hian a fanu kawthalo hi inah arawn kalpui a, a kawthalo chu a nasain luak nên a bei nasa hle a. Luak damdawi chu a awm a; mahse, kawthalo damdawi ka kawl lai a lo thi tawh (*expire*) hlauh mai si a. Tichuan, kohhranhovin min tawngtâipui thîn tih hre reng chungin chu damdawi thi tawh chu Pathian rinchanin kan pe pawp mai a. Kan ringamna kha Pathianin a hmuh hmaih lo va; damdawi chu mal a sâwm a, damlo pawhin eng mah harsatna dang nei lovin a tûk aţang chuan dam lam a lo pan ta a ni.

Zan khat pawh zân rei tawh lamah hian ringlo mi pakhat hian minrawn au vak vak a, “*Ka nu hi a thi mai dâwn. Tih dân i hria em? Eng mah a ei thei tawh lo va, biak pawh min chhâng peih tawh lo,*” arawn ti a. Zân a rei deuh tawh vâng leh amah kha zu rim a nam deuh avângin a thu sawi kha tak tak nge dâwt ni ang aw tiin ka inngaihtuah buai hman deuh va. Mahse

zân rei tawh lamah tap deuh tuauva a rawn kal peih ka ring chiah lo va. Tichuan, “*Min lo nghâk la, damdawi kan en fel ang e. Ken tûr a awm ang,*” ka ti a. Chutia damdawi ka khawn khâwm chu Pathian kutah kan kal hmain ka hlân hmasa ta a; tichuan, kan inzui chhuak ta a.

An in kan thlen chuan a nu chu a lo chau angreng viau va, “Mihring kan inchan lo mai ang â!” tih rilruah a awm hman a. Mahse Pathian rinchhan bawkin ka damdawi ken ang ang chu kan pe a tawngtâina hun te ka hmang a, ka hawsan leh ta a. A tûk a tang chuan Pathianin tidamin, thut pawh thu peih tawh lo kha a rawn harh chho ve zêl a, a rawn dam chho ta a. Chuta tang chuan an

chhûngkua nên pawh inkawmna hun tha tak te kan nei thei ta thîn a, an thlai thar tha tha te pawh min rawn pe ve thîn a. Engtik niah emaw chuan ringtu tha tak an nih ngei ka beisei tlat a ni.

A tâwpna atân chuan

Karbi ramah hian rawng-bâwl na tûr a la tamzia hi a hmuna hmuh mai ai pawhin a nasa zâwk a. Hei aia darh zau zâwka insem darh hian hma lâk zêl hi a chhâkawm hle. Rawngbâwlnain hma a sâwn zêl theihna tûrin kan rawng-bâwlnate hi hmangaihna dik tak nên, lainatna nên, dawh thei taka rawngbâwl zêl thei tûr tein min lo tawngtaipui zêl tûrin ka sâwm che u a, in tawngtaipuina hian chakna min pein inrin tâwkna min neihtîr thîn a ni.



Missionary pakhat hian Hindu hnam hnuaihning (Dalit) nu pakhat hnênah hian an temple saknaa an sum hman zât a zâwt a. Chu nu chuan mak ti hmêl tak hian missionary chu a en a, “Ka hre lo rêng rêng. Kan pathian in kan sa a, a man kan chhût lo. A tûl zât zât kan pe mai,” a lo ti a.

Milem pathian betute pawh an pathian tân an inhuam a, insênso an hreh lo. Lalte Lal, pathiante Pathian tân hian eng chen nge kan huam ve le?

SOLOMILE KHUAA RAWNGBÂWLNA

C. Lallawmsangzuali, Evangelist

Solomile, Arunachal East

Mobile No: 7086670361



Kan rawngbâwlna hmun, Solomile Preaching Station (PS) hi Jairampur Pastor Bial chhûng, Arunachal & Assam Mission Field East chhûnga awm a ni a. Solomile PS hi ni 5 March, 2017 khân din a ni a, kan kohhran member-te hi Nepali leh Adivasi an ni. Adivasi phei chu mi hnuaiah inhlawhin, thingpui huanah hna an thawk thîn a.

Solomile PS hi a din tirh chuan member pawh an awm ve nual a. Mahse, hna an hmuhna apianga insawn thîn an ni a. Hetah hian an rawn kîr tawh meuh loh avângin, kan pung hlei thei lo a ni. Kan member-te hi khawsak pawh sâng lo, mi nun tlâwm, zakzum tak an ni a.

Kumin hian Solomile Preaching Station-ah Pathian-in ringthar mi pahnih kan nei a, kan lâwm hle. In 9 kan ni a, member 31 kan awm mêk a ni. Chhûngkaw khata Kristian pakhat chauh awmna pawh kan awm.

Biak In hi kan nei lo va; kan in luahna bula in dîng

pindan pakhatan kan inkhâwm thîn a ni. A tângpuiin mi 10 - 20 kan inkhâwm thîn. Kâr khatah wawi khat, Pathianni chawhma inkhâwm hi *sermon* nân leh Bible châng pawimawh vawn (*by heart*) nân hun kan hmang thîn.

Kan kohhran member-te hi an hotute ringlo an nih avangin Pathiannia hna an thawh châng te, inkhâwm bâna hna thawh châng te an nei bawk thîn. Kan member-te hi kan awmna bul hnaiyah an awm lo va, hla tak aţangin kêin an rawn kal thîn a. Ni sat ni te, ruah sûr tam ni te hian an khawngaihthlâk thîn hle. Pathianni zîng hi dâr 10:00-ah kan ţan a, a châng

chuan dâr 8:00-ah an rawn thleng t̃an tawh th̃in.

Krismas hi sakhaw dangte pawhin an hrethiam a. Member-te n̄n h̄im takin kan hmang ho th̃in a ni. Amah-erawhchu, Good Friday hi an pute hian an hriatthiam loh av̄angin, inkh̄awm pawh kan tam thei lo va, mi 10 t̄lin loh ch̄ang pawh kan nei a ni. Good Friday hi chu a khawh̄arthlak th̃in hle.

Kan rawngb̄awl̄na area-ah hian harsatna kan t̄aw̄k hran lo va. Nupui pasal neih chung-ch̄angah hian hmeichhe din-hmun hi hnam hrang hrangah hian a inang khawp mai a. Hmeichhiain pasal a neih chuan a pasal sakhua, hnam leh nunphung hi an zawm ngh̄al a. Rawngb̄awl̄na rilru ātang chuan an uiawm th̃in khawp mai. Kan thenawmah hian Kristian

chh̄ungkua ātang piang leh sei lian, pasalte sakhuaa awm ta mi pali lai kan nei a. Pakhat phe chu Baptist Pastor fanu, pakhat a pa Mizo, a nu Nepali an awm a. An pasalte sakhuaa mi t̄angkai tak ni tate an ni a. Mahni hnampuih phe chuan rilru a na duh khawp mai a. Inkh̄awm t̄ur hian kan la ins̄awm hlawh-tling thei lo va. T̄awngt̄ainaah pawh min lo t̄awngt̄aipui t̄ur tein ka nḡen che u a ni.

Rawngb̄awl̄naah hian rilruin th̄ahnem ngai mah ila, hma s̄awn a harin, ringthar neih hi a harsa êm êm a, t̄awngt̄aipui kan ngai hle a ni. Kan kohhran memberte hi chak lo t̄ê t̄ê kan ni a. Member tam lo mah ila, zu leh ruih theih thil hian min tibuai ve hle a. Anmahni enkawl thiam t̄ur hian finna te kan mamawh a. T̄awngt̄aipui kan ngai tak zet a ni.

T̄hian pathumte hian mi pakhat, lungawi loh hm̄el zet hi an t̄aw̄k a. An z̄inga pakhat amah hre Chiangtu chuan, *“A chungah thil t̄ha lo tak a thleng a nih loh v̄ek chuan tuin emaw v̄anneihna a dawng a nih d̄awn saw,”* a lo ti sap a. Mi tâna ins̄engso th̄inte hi mi dang th̄ikin rilru n̄ain an awm kh̄at hle.



JAMPUIJALA LAM VE THUNG

*P.C. Zoremsiama, Evangelist
Jampuijala, Tripura Mission Field
Mobile No: 7005093198*



Kum 2024 January thla khân Jampuijala-ah hian Evangelist tûrin ka lût ve a. A khaw chanchin tlângpui ka han târ lang ang e.

Jampuijala khua/kohhran hi Tripura Mission Field, Khumulwng pastor bial chhûnga awm a ni. Tripura khawthlang lam district pahni - West Tripura leh Sepahijala inrîna lai bâwr vêla awm a ni. A khua hi a lian ve khawp mai a, sorkâr hmun pawimawh (*office*) a awm ve nual a; tin, a khaw chheh vêla tlâng mite tâna tângkai, bazar hmun pui te pawh ti ila a sual lo vang. A khua hi tlâng bâwk tê tê leh phaizâwl inpawlh a ni a. Thâl/nipui lai hian a lum hle a, January thla leh February thla tih loh hian a lum kumtluan a ni mai e.

Tripura Tribal Area Autonomous District Council (TTAADC) huam chhûnga awm niin a mi chêngte hi

www.mizoramsynod.org

Debbarma an ni a, Debbarma hnam hlâwm awmna a ni. An tawng hman pui ber hi Debbarma tawng (Kokborok) a ni. A khaw chheh vêl – tlâng ram chin deuhvah hian zohnahthlâk (tlâng mi) hnam – Kalai/Koloi hnam, Kaipeng hnam leh Molsom hnam te an inzâr pharh ve bawh.

Khawpui tê chanchang ve deuh a nih avâng hian ei zawinna hi chi hrang hrang – sorkâr hnathawk te, zirtîrtu te, sumdawng te pawh an awm nual. An hnathawh langsâr ber chu *rubber* huan enkawl a ni deuh ber, leilet lam buaipui te pawh eng emaw zât chu an awm bawh. Ei zawinna leh hnathawh kawngah hian an thatchhe lêm lo va, zirna pawh an ngai pawimawh hle.

Sakhuaa lamah hian Hindu sakhuaa zuitu an ni a, an sakhuaa hian an ngheh viau laiin Kristianna hi a luhna a rei tawh avângin nghing pawh an awm tho bawk. Kristiana lût hmasate leh tûn hnaia lûtte pawh hi Kristianah hian an nghet khawp mai a; chutih laiin, *active* lêm lo, Kristian ruh tak an thahnem ve tho bawk. An sakhaw ngaia lêt leh te pawh hriat tûr an awm, an tam lêm lo thung a.

Kristianna hi a langah hi chuan an dodâl lo viau chung hian an sakhua hi chu kalsan mai an harsat ve hle thîn. Kristiante hun pui leh thil tih te hi hnawk an ti lêm lo va. An sakhaw thil te, hun pui te zalên takin leh ualau takin an hmang a. Kristiante pawhin ualau leh zalên takin kan hmang ve bawk thîn. Chhiah pawh Hindu-ho inhâl na hmun bulah inphûm min phal-sak a, kan inphûm ve mai thîn. A hmun hi a zauh loh vângin thlân-mual tûr mamawhna hi a sâng hle. Hmun âwl a vâng a, thlân-mual hlauhna avâng te pawh a ni mahna.

www.mizoramynod.org

Kristianah hian anmahni duh thu ngeia lo lût te pawh sawi tûr an awm a, a tam zâwkte erawh chu, *prochar-* a kan tîtipuina aţang te, mi mal lên kualnaa kan tîtipuina aţang tea baptisma chang an ni tlângpui. An zavaiin ni lo mah se kan ringtharte hian inkhâwm leh hnatlâng te, ina inkhâwm tûra kohhran ho sâwm te an taima hle a, thil lâwmawm tak a ni. Biak in a hlat avângte leh hna tûl avânga inkhâwm thei lo pawh an awm bawk. Kristiante leh thawktute hian dodâl na kan tâwk lêm lo.

Kristian pâwl hrang hrang an awm nual a. Kristiante hian thil tih pui (Christmas Mela) hi an buatsaih thîn a. Chutah chuan zu rui/drugs rui an kal ve ngai lo (ringtu leh ringlo zîng aţang pawhin) ti ila kan sawi soal lo vang.

Jampuijala-ah hian rawngbâwl na a inhawng zêl a. Kristian hmasa te, ringthar lo awm zêl te, sawh ngheha, an rinna tih chaka, fuih thara,

ṭawngṭaipui zêl hi thil ṭul tak a ni a. Hei hian an chheh vêla ringlote tân ringtu nih duhna a keng tel. An sakhuaah hian a nghetate hi an nghet viau a; mahse, ringthar neih kawng pawh chak vut vut lo mah ila, zâwi zâwiin kawng a in-hawng ve zêl a ni.

Kohhran pawh kum 20-a upa a lo ni ve ta reng mai a. Chutih rual chuan ringlo kâra awm kan nih miau avâng hian enkawla, la chhawm-dâwl erawh an ngai hle a ni. Kum 2024 - 2026 chhûnga ringthar leh kohhran *statistics* lo târ lang ila.

1. Kohhran in – 17 (inawm pawlhna nêen)
2. Kohhran member – 56
3. Dân zawhkim – 44


Ringthar neih dân

1. 2024-ah 2
2. 2025-ah 10
3. 2026 (April thleng) – 2

Rawngbâwlina hma lâk a phûrawm hle a. Pathian zârah ringthar kan neih zêl nân te, kohhran hote rinnaah an nghet zêl theih nân te, an ṭawng kan thiam chian lehzuall theih nân te, inpêkna ṭha kan neih zêl theih nân te min lo ṭawngṭaipui zêl tûrin kohhranhote kan inngên a ni.

*En teh, tuiptui râl ram hla
[takah sâwn,
Chhandamna hre lo sâng
[tam tak an boral mêk;
Chhandamna thu chah an
[hnêna puang tûrin,
Makedonia (Tripura) ram-
[ah lo kal thuai ang che.*

Kum tam tak kal taah khân khaw pakhatat hîr a ngîng a. Chu khuua chêngte chu an mangangin, an thlabâr hle hlawn a. Mahse, an khaw pitar pakhat erawh chu a lo hlauthâwng ve rêng rêng lo va, a hlim hmêl zâwk a. Mite chuan mak an ti hle mai a, “*Ka pi, i hlau ve na nge?*” tiin a zâwt a. Ani chuan, “*Hlau lo ve. Khawvêl tinghîng thei Pathian ka nei tih ka hriat hian ka lâwm a ni,*” a lo ti a.



HOME MISSION NORTH-AH KÂR KHAT

Lalrinnggheta

Asst. Coordinator, SMB Office

Mobile No: 9856804149



Synod Mission Board hnuaia rawngbâwlina hmun pawimawh leh hlun tawh tak ‘Home Mission North’ (*Mamit district leh Kolasib district*) chhûnga Bru leh Chakma zînga kan rawngbâwlina hmunte zir chiang leh tlawh tûrin *OHM 18/2025-2027 of 18/03/2026* chuan SMB Headquarters office thawktute - Tv. Lalrinnggheta, Asst. Coordinator leh Pu B. Lalringliana, Mission Promoter te min ruat angin April ni 13 – 18 2026 chhûng khân kan feh chhuak a. HM North kan tlawh kualna chanchin tângpuite ka rawn târ lang ve ang e.

Home Mission North (HM North) huam chhûng rawngbâwlina hi Tirkkoh Thangzawna leh Tirkkoh Lalhleia te Bru zînga thawk tûra tirk an nih kum (1949) kha Synod chuan HM North rawngbâwlina tan hunah a chhiar a. Hemi hma kum (1948) vêlah pawh Tupuibari II (Rajiv Nagar ni ta)-ah hian Tirkkoh Lianngura chu rawngbâwlin a lo awm tawh nia hriat a ni bawh.

HM North huam chhûngah hian Pastor bial 19 awmin, bial 16 (Bru leh

Chakma awm tamna)-ah SMB hian rawngbâwlina a kalpui a, Missionary 206 awmin, school 11 kan nei bawh.

Kâr khat chhûngin kan hmunhma a tam thei ang ber tlawh tûr kan nih angin, ni 13 April, 2026 (Thawhtanni) zîng dâr 6:00-ah Synod Office aţanga chhuakin, South Chhimluang khua kan pan hmasa ber a. He khua hi Kolasib - Bairabi kawng aţanga hnai tê ni mah se, thâlah lo chuan motor luh a harsat avângin tlawh hmasak-ah kan nei a. An khaw luh

dâwnah kan motor tângin, thawktute puihna zârah kan chhuak thei a, chawhma dâr 11:00 vêlah kan thleng a ni. He khua hi Bru khua, in 140 vêl niin ring lo mi 60 vêl la awm anga ngaih an ni a. Synod Home Mission School (pâwl nga thleng zirna)-ah thawktu Evangelist Teacher leh Nurse ten rawngbâwna an kalpui mêk a ni.

South Chhimluang atângin chawhnu dâr 3:00 vêlah Synod Inkhâmpui 2024-in Bial thar a hawn Saikhawthlir panin kan chhuak leh a. Pastor quarters leh Evangelist quarters sak mêk te kan tlawh kual hnuah tlai dâr 5:00 vêlah Sihthiang khua kan thleng leh a. Sihthiang khua hi Mizoram Bru khaw zînga lian ber pathumna, in 300 bâwr vêl niin Kristian deuh vek angin inchhâl mah se, bâwlpu telin ring lo mi tlêm tê an la awm a ni. He khuaah hian Synod Home Mission School (pâwl riat thleng zirna) awmin Evangelist Teacher leh Nurse ten rawngbâwna an kalpui

www.mizoramsynod.org

mêk a, Biak In tha tak neiin an kohhran pawh a chang-tlung hle.

Ni 14 April, 2026 (Thawhlehi) zîng dâr 7:00-ah Tuidam Bial chhûng tlawh tûrin kan chhuak leh a. Kalkawngah Rengdil leh Tuidam Pastor quarters te tlawh pahin bial chhûng Upa remchângten min lo hmuak bawk. Hemi ni hian Tuidam Pastor hovin Tumpanglui, New Eden, Chhimluang (Mizoram-Tripura border)-ah te hun hmangin thawktute nêin kan inkâwm ho va. New Eden-ah hian Synod Home Mission School (pâwl nga thleng zirna) leh Nurse awmin Mission Compound an nei nuam hle. Tlai lamah Thaidawr Bial tlawh tûrin kan chhuak leh a, tlai dâr 4:40 vêlah Thaidawr thlengin Synod Home Mission School (pâwl riat thleng zirna) kan tlawh nghâl a. Thawktuten ruai lo buatsaihin puar taka kan kîl ho hnuah zân lamah kan inkâwm ho leh bawk. Thaidawr hi kumin kum tâwp lama Bru Convention 2026

thlengtu tûra Home Mission North Working Committee (36:4)-in a thlan a ni bawk.

Ni 15 April, 2026 (Nilaini) zîng dâr 7:00-ah Thaidawr chhuahsan lehin Mualthum khuua evangelist quarters leh biak in te kan tlawh kawi hnuah Zomuantlâng panin kan kal leh a. Tripura Mizo khaw hrang hrang tlân pèlin Tripura-a tlâng sâng ber feet 3,200-a sâng Betlingchhîp (Mizoten Behliangchhîp kan tih) bula awm Zomuantlâng hi tlai dâr 4:00 vèlah kan thleng a. Thawktu leh Kohhran Committee ten min lo hmuak a, zanriah tuihnai tak kan kîl ho leh bawk. Zân lamah Nilai zân inkhâwm thupui zir tûr thulh meuhvin *sermon* leh *report* pèkna hun min siamsak a, Kohhran Hmeichhe zaipâwl te an zai bawk.

Zomuantlâng hi khaw danglam tak, kawngpui lehlam Tripura, lehlam Mizoram niin, kan Synod hmunhma leh biak in te Mizoram lama awm a ni a.

Zo thlifîmin a chhêm heuh heuh khuu niin, a khaw sik leh sâ boruak a nuam hle. Zomuantlângah hian Synod Home Mission School (pâwl nga thleng zirna) awmin, thawktu Evangelist Teacher leh Nurse te an awm bawk.

Ni 16 April, 2026 (Ningani) zîng dâr 6:00 vèlah ‘Home Mission North huam chhûnga rawngbâwl na harsa ber’ an tih Chakma khuu Khantlâng panin kan chhuak leh a. Khantlâng-ah hian Martar Nl. Rohmingthangi thattu unaupa te pawh la damin, a kawmchhak lawkah kan kohhran biak in a awm a, kohhran member pawh mi 80 vèl an ni. An khuu hi in 140 vèl niin Kristianna an do hle a, thawktu pahni an awm mêk bawk. Khantlâng aţang hian Mizoram hmar lama ‘Chakma khawpui’ an tih Rajiv Nagar kan pan leh a. Tuipuibari Pastor leh Pro. Pastor hovin Rohmingthangi Memorial School (RTMS) pâwl kaw thleng zirna hmunhma leh *classroom* te tlawh kualin, thawktute nê

kan inkawm ho leh bawk. Rohmingthangi Memorial School (RTMS) hi school tha leh lâr tak niin zirlai pawh an ngah hle. Rajiv Nagar atangin Tuipuibari pan lehin Lilabon Memorial School, Persang (pawl nga thleng zirna) tlawh lehin thawktute nen hun kan hman hnuah Mizorama Bru khaw lian ber Damparengpui kan pan leh a. Damparengpui hi SMB rawngbâwlina hmun hlun tak, compound zau leh changtlung tak nei niin, Synod Home Mission School (pawl 11 thleng zirna) nei niin *Matric result* pawh an nei tha thîn hle. Zân lamah Bialtu Pastor hovin thawktute nen kan inkâwm ho va, hun hlimawm tak kan hmang ho leh bawk.

Ni 17 April, 2026 (Zirtawpni) zîng dâr 6:00 vêlah Salem Boarding School (pawl 10 thleng zirna) tlawh tûrin kan chhuak a. He school hi SMB hnuai school hlun tak niin, compound zau takah zirtirtute bâkah Agriculture Worker-te an awm a, kum tin thei leh thlai hrang hrang an

www.mizoramsynod.org

thar chhuak thîn bawk. Salem Boarding-a hun kan hman zawhah Marpara panin kan chhuak a. Pukzîng Pastor leh Pro. Pastor te kan tlawh hnuah tlai dâr 5:00 vêlah Marpara Mission Compound thlengin Pastor, Pro. Pastor leh thawktute nen zân lamah hun hlimawm tak kan hmang ho leh bawk. Marpara hi khaw hlun tak niin SMB-in rawng kan bâwlina lam hi Chakmate chênna Marpara North Bial niin Synod Home Mission School (pawl kaw thleng zirna) a awm bawk.

Ni 18 April, 2026 (Inrinni)-ah Marpara Bazâr te fangin Synod Home Mission School, Marpara leh compound te kan fang a. Thawktute nen hun kan hman zawhah West Phaileng panin Thawhtanni zîng dâr 6:00 vêlah kan chhuak a, tlai dâr 5 vêlah Aizawl dam takin kan thleng leh ta a ni.

Home Mission North-a kan rawngbâwlina hian hma a sâwn hle a. **Kum 1949** atanga Bru zînga bul kan tan

chu 2026-ah chuan Bru hnam bik hi ringtua chhâl theih deuh vek an ni tawhin a hriat a. An zingah Pastor, Kohhran Upa leh Missionary thahnem tak an awm tawh bawk. Home Mission North-a Chakma chênna Marpara North Bial, Tuipuibari Bial leh Thaidawr Bialah te Chakma thahnem tak an awmin, Buddhist sakhaw zuitu an ni a. An hruiatuten Kristian

an nih loh nân kawng hrang hrangin hma la nasa hle mah se, Chakma khaw tam zâwkah kohhran a ding tawh a, hma lâkna tûr erawh kan la ngah hle thung. India ram hmun danga Chanchin Tha hril a harsat chhoh êm êm laiin zalên taka kan chêt theihna kan ram chhûng ngeia Isua ring lo leh do tlat an la awm avâng hian kohhranhoten tan i la zêl ang u.

Miltiades-a (554-489 BC) khôn Grîk sipai 10,000 hruiin, Persia sipai 3,00,000 te chu Marathon Indopui (490 BC)-ah khôn ropui takin a hneh a. Mi zawng zawngin an ngai sân a, a hming a thang ta hle mai a. Chutih hun lai chuan Themistocles-a (524-460 BC) chu sipai niin, râl hmatâwnga tang a ni a. *“Miltiades-a hlawhtlinna hian min timuhîl thei lo,”* a ti a. Miltiades-a anga sipai General hming thang nih chu a tum ruh hle a. Intihhlamna lam a bânsan a, rilru leh taksain nasa takin a inbuatsaih a. Tichuan, Salamis Indopui (480 BC)-ah chuan tuipuih Persia nên indovin, a kaihhruainain Grîk sipaite chuan hnehna ropui tak an chang ta a; mi lâ leh fak hlawnh tak a lo ni ta a. Mahse, 471 BC-ah chuan thu neihna hmang sualah te, sum leh paia rinawm lohva te leh mi chapo lutukah te puh niin, paih thlâk a ni a. An hmêlma, Persia ramah râl lânin an khawngaihna a dîl a. A thih (459 BC) thlengin chutah chuan a chêng ta a ni.

Mi hlawnhtling, mite ngaih sân leh hriat hlawnh nih châkna hian mihring hi nasa takin a tichhelin, a chher thei. Leia chawimawina dawng tûr maha miten an theih tâwp an chhuah chuan, vâna chawimawina dawng tûr chuan rinawm tak leh chhel taka inbuatsaih tûr kan va ni lehzuah êm! *“Tin, intihsiaknahte chuan a bei tâlh tâlh apiang chu engkimah an insûm thîn a ni. Anni zawngin lallukhum chhe thei hmu tûrin an bei a, keini erawh chuan lallukhum chhe thei lo hmu tûrin”* (1 Kor 9:25).

JEHOVA-JIRE

*Tichuan, Abrahaman chu hmun hmingah chuan
Jehova-Jire a vuah a (Genesis 22:14)*

*C. Lallawmsangi, Evangelist
Dumporijo, Arunachal North
Mobile No: 8413822310*



Biak in luah hawha kan awm avângin Pathian hnênah biak in hmun ram dîlin kum nga kan tawngtai hnuin, kum 2024 August thla tâwp khân biak in hmun tha tak mai 749 Sq. metre-a zau chu ₹ 17,00,000-in Pathian mite hmangin lei a ni a, kan lâwm hlê.

Ka lâwm rual rualin, “*Engtin nge kan sak ang?*” tih ka ngaihtuah nasa hlê a, nu paruk inkhâwm thînin, naupang pahnih baptisma chang kan nei a ni mai a. A thawktu ber hmeichhia ka nih bâkah ka mistiri lovin perek tak ngial pawh ka chhu ngîl thei baw si lo!

“*Engtin nge bul kan tan tâk ang, Lalpa?*” tih chu ka tawngtaina a ni. Mistiri leh *helper* rawih dâwn pawhin *contract* lo chuan hmuh tûr an vâng êm êm a. Mahse, thawktu pasal, mistiri, Pu Dinga leh Pu Manuna ten *helper* pathum nên ban khur minrawn laihsakin *daily rate*

angin bul minrawn tansak a, Krismas dâwn a nih avângin an thawk chhunzawm thei ta lo va.

Pathian hnênah thawk chhunzawm thei tûr kan dîl reng a. Madanriting, Shillong Ramthar Committee huai-hawtin ni 4 – 11 March, 2025 chhûngin mi 37 lai mai anrawn *Work Camp* bâkah ₹ 30,000 lai min pe baw a. Anrawn thawh hun lai hi Arunachal Setana *Bill* put luh tuma Kristian leh ringlo boruak so sân lai tak a ni a. Tin, biak in sak kan tan chhoh lai hi kum 2024 November thla tâwp niin min bialtu berâmpu ber kha taksâ leh

thlarau lamah bawrhsâwmna nasa takin a tlâk buak lai a nih bawk avângin harsatna kan tâwk nasa a.

Mahse, Daporijo Kohhran member te leh rawngbâwlpui te leh Taliha Sippi lama thawktu ten vawi thum lai min pui bawk a. Bul kan tan lai hian motor a lût thei lo va, motor luh theihna chin aţangin chhîpa phurh a ngai a. Biak in sak rualin a hnuai *missionary* quarters sak tel a ngaih zêl avângin sênso a thuah hnihin, hun a duh rei êm êm a ni.

Sum neih sâ êm êm kan neih loh avângin rinna leh ţawngţaia sak a ni ber a. *“Tichuan Abrahaman chumi hmun hmingah chuan Jehovah-jire a vuah a; wawiin thlenga, ‘LALPA tlângah ngaihtuah a ni ang chu,’ an ti ţîn ang hian,”* (Genesis 22:14) tih ang khân kan ţawngţai chhânna chu kan hmu a. *Short term missionary* mistiri thawktu kan dîl hlawhtling leh a; tichuan, *“Engtin nge kan sak zawm ang, Lalpa?”* tih ka ngaihtuah

buai lai chuan kum 2025 April thla tîr khân *‘Jehovah Jire’* (Lalpan a pe) tih thu hi ka thinlungah a lo lang tlut tlut a. Neih lâwk sâ a awm lo mah se *Short term missionary*-te haw hnuah, kum 2025 October chawlhkhâr hnihnaah NERIST Mizo zirlai inkhâwm ten ni nga chhûng mi 33 lai an rawn thawk leh a. Ruantlâng Kohhran Ramthar Committee ten ni 28.11.2025 - 3.12.2025 khân min rawn puiin, mi 11 an lo kal a ₹ 1,00,000 min pe bawk a.

Short Term Missionary kan dîl hi kan hmu leha an rawn thawh leh chuan Pathian zârah rinnain kan sak zawh ve ngei kan beisei. Hêng ka sawi chhan chu kan tih theih awm si lo, kan tih ni si hi Pathian intum chawpna Jehovah Jire a va ni êm!

Abrahama khân Pathian intum chawpna Jehovah Jire a chan hma khân Pathian thu âwihin a fapa duh lai, a neih chhun, Isaaka a hlan ngamnaah khân Pathian chuan Isaaka aiah berâmno a pe a,

malsâwmna tam takin a vûr zui! Abrahama thlah aţangin Isua Krista lo piangin, khawvêl mi tin tâna thi a, tho leh Chhandamtu Isua kan lo nei thei ta a ni.

Keini pawhin Pathian intum chawpna Jehovah Jire

kan chan zêl theih nân keimahnia kan duh tak Isaaka hi Pathian tân kan hâl ral ngam zêlnaah leh a tân kan mual-pho ngamnaah Pathian thian leh a malsâwmna dawngtu kan lo ni thei zêl dâwn a, mi dâng tân pawh malsâwmna kan lo ni zêl dâwn a lo ni.



a sawi rei thawkhat tawha, tih tâwp a hun ta ti ni âwm tak hian Gallery hmaa sana intâr chu a han thlêk a.

Pastor chuan chu pa che zia chu ngun takin a lo thlîr a, heti hian fiamthu ti takin a sawi ta a: *“Kan ramah hian kan Pathian Biak Inkhâwm dânah thil a lo inthlâk nasa ta hle mai. Kan pi leh pute kha chuan sana hi Biak In pâwn lamah an târ a, miten inkhâwm hun an hriata an tlai loh nân a ni a. Tûnah erawh chuan Pathian Biak In chhûngah kan la lût ta a, amah biakna hmuna kan awm rei lutuk loh nân a ni ta. Thil inthlâk lungchhiat-thlâk tak a ni,”* tiin.



RAMTHAR FEH

1.

- | | |
|----------------|--|
| 1. Field | : Assam Mission Field |
| 2. Tlawh | : Bhairabkunda Pastor Bial |
| 3. Tlawh hun | : Ni 14 - 20.11.2025 |
| 4. Tlawhtu | : Zemabawk South Kohhran |
| 5. Kal zât | : Mipa – 19; Hmeichhia - 11 |
| 6. Tlawh chhan | : <i>Work camp</i> cum kohhran tlawh |
| 7. Hna thawh | : Pastor quarters sak leh approach road siam |
| 8. Senso | : ₹1,31,605 |

9. Lâwmawm lam: Ramthar Committee-in kum 2025 kum tîr aţangin ramthar zin *project* a siam a. Hemi atân hian ramthar pual lehkhâ ip, bawm lêng, thil zawrh, ni khat hlauh hu theh khâwm hmang tein sum kan tuak a. Kan tlin tâwka hma kan lâk hnuin Kohhran Committee-ah ka ruahmanna leh sum kan mamawh dân te kan thlen a. Kohhran hruaitute inhawanna leh inphalna azârah Bhairabkunda Pastor Bial tlawh leh *work camp* neihna hun kan nei ve thei ta hlauh mai. Hei hi kan kohhran kan indan aţanga keimahni puala kan feh chhuah vawi khatna a ni nghe nghe a ni. Kan mamawh leh dîlna te min hriatsaka min tihhlawhtlinsaktu, kan Pathian hnênah lâwm thû kan sawi tak zet a ni.

10. Kalkawng leh hun hman dân: Ni 14 (Zirtâwpni) tlai lam dâr 3:00-ah Upa C. Kapengan Pathian hnênah ţawngţainain min thlah a. Upa Vânlalchaka, Kohhran Chairman uapna hnuaiâh, biak in tual aţangin bus-in Sairang Rêl station kan pan a, tlai lam 5:00-ah Sairang Rêl station kan thleng a. Zân 7:00-ah rêlin Guwahati panin kan chhuak leh a. Guwahati hi a tûk ni 15.11.2025 zîng 8:30-ah kan thleng a. Guwahati Rêl station-ah Bhairabkunda thawktu, Pu TH Liankhup leh Tv. Hilarus-a ten min lo hmuak a, kan lâwmin kan thla an timuang hle. Anni hian kan kal lehna tûr bus min lo ruahmansak sâ

thlap a. Rei châwl lovin dâr 9:45-ah bus-in kan chhuak leh nghâl a, tuang takin tlai 2:00-ah Bhairabkunda kan thleng ta a ni.

Bialtu Pastor, Rev. Isaac Lallâwmkima leh thawktu chhôngkuaten thingpui leh a hmeh tui takin min lo hmuak a. Sikul devotion hall-ah lût khâwmin inhmêlhriattîrna te neiin, Pastor-in Pathian hnênah lâwm thù sawina a neih zawhin kan thlen in tûra an lo ruatah kal darhin kan han insil harh a. Kan bungruate kan riahna tûr hmunah kan dah a. Hna thawhna tûr hmun leh thawh tan dân tûr te kan en ho nghâl a. Hemi tlai hian thawktute quarters hrang hranga kan iptepui bânna tûr min lo ruatsakah zanriah kan ei a, zanriah min lo buatsaihsaktute chungah kan lâwm hle. Zân inkhâwmah hun min lo pêk angin Pu Lalfakzuala, Ramthar Committee Secretary-in thu a sawi a.

Ni 16 (Pathianni) chawhmaah bial chhông kohhran hrang hrangah inthen darhin, kan tlawh a, chuta thuchah puangtute hming nêh han târ lang ila: Bhairabkunda Kohhran (*T. Upa Lalengzama*); Paharpur PS (*Pu Lalhnehkima*); Sapangaon Kohhran (*Nl. Vânlalringi*); Balemu PS (*Pi Lalnunchangi*); Kobidanga PS (*Pu Lalnghilhlova*); Udalguri PS (*Pu B. Lalhmingthana*).

Hêng hmuna awmte rawngbawl dân chanchin leh dinhmun te kan ngaithla a, thawktute inpêkna a fak awmin Pathian hna thawh a ropui kan ti hle. Kan tlawh kohhrante hian thil pêk hlu tak min lo pe theuh a. Kan lâwm tak zet a ni. Keini lam pawhin nau piang chibai bûkna thil pêk chêng 4,000 theuh kan hlân a ni.

Pathianni zân inkhâwmah Upa Vânlalchaka, kan Leader (kan kohhran Chairman)-in Zemabawk Kohhran *report*
www.mizoramsynod.org

a pe a. Pastor-in thuchah a sawi a. Anni hian kan zavaiin thil pèk hlu tak min pe a. A ropui kan tiin, kan lâwm hle a ni.

Ni 17&18 khân zîng khawvâr hlim aţangin phûr takin hna kan thawk a. Mahni hna chanpual theuh, Pastor quarters thar kal kawnga *boulder* phah, RCC chhûn, *partition & kitchen cabinet* siam leh *electric wiring* hnate thawkin kan ţang tîang hle a. Chhûn ni sensa hnuaia thawk pâwl te, zân rei tak thlenga thawk te kan awm a. Tu mahin harsatna lian tham tâwk lovin, inpawh leh hlim tîang takin kan thawk ho thîn a, a lâwmawm hle. Thawktute leh Pastor ten min lo uap reng bawk thîn.

11. Report tûl dang: Bhairabkunda Mission Compound-ah hian thawktu: Pastor 1, Evangelist 4, Evangelist Teacher 17, Nurse 1 (an vaiin 23) an awm a. Pastor Bial chhûng hmun dangah Evangelist 4, Field Worker 4, Kraws Sipai 8 an awm bawk. Thawktute hi an felin an ţang tîang hle a, an inpêkna a ropui hle a. Kumin (2025) chhûng khân ringthar pawh an nei nual a; thenkhat phei chuan ringthar *target* an khum hial a ni.

Bhairabkunda-ah hian sikul ţa tak leh changtlung tak, St. Paul's School an nei a. Nursery aţanga Class X thleng zirna niin, zirlai pawh 400 chuang fê an nei a ni. SPS hian kum ruk zet a zâwnin HSLC 100% pass result an nei a ni. Thawhtanni zîng *school devotion*-ah T. Upa T. Lalchhuanglian hun a hmanpui.

Zânah Mission Compound inkhâwm a awm a, a tâwp zân ni rih lo mah se, inpâwl khâwmna hun kan hman hona hnuhnung a nih avângin Compound hmingin NGAIHHRUINA *frame* mawi tak min pe a. Keinin compound puala a tûl anga an hman tûrin chêng 5,000 kan pe ve a. Keini lam aiawha thu sawi tûra ruat, Pu P.C. Vânlalhriata te chu *electric wiring*

hna lama ṭhahnem an ngaih deuh avângin an hna an chhunzawm a. A aiah T. Upa T. Lalchhuanglian an hun a chang ta a ni.

Ni 19 (Nilaini) zîng dâr 4:30-ah chhuakin, thawktu aiawhin Pu Thangpu Singson chuan Guwahati thleng min hruai a, kan lâwmin kan thla a timuang hle. Guwahati aṭangin Sairang thleng rêl bawkah chuang lehin Sairang aṭangin bus-in kan kal leh a. Zemabaw South chu tuang takin ni 20.11.2025 Ningani dâr 11:30-ah kan thleng leh ta a. Bus aṭanga kan chhuah darh hmain Upa Vânlalchakan lâwm thû sawi ṭawngṭaina a hlân a. Min lo hmuaktute nên hlim taka inchibaiin kan ṭin darh ta a ni. Kan zin chhûng zawnga min hruaitu Pathian hnênah lâwm thû kan sawi mawlh mawlh a ni.

Lalfakzuala, Ramthar Ziaktu

2.

- | | |
|-----------------------|---------------------------------|
| 1. Field | : Home Mission North |
| 2. Khua | : Marpara North |
| 3. Tlawh hun | : Ni 9-12 March, 2026 |
| 4. Tlawhtu | : Dawrpui Vengthar West Kohhran |
| 5. Kal zât | : Mi 18 |
| 6. Tlawh chhan | : <i>Work camp</i> |

7. Lâwmawm lam : Kumin 2026 kum tîr têah khân Ramthar Committee ten feh chhuah thu kan rêl a, ‘A hmun atân kan kohhran aṭanga Missionary-a kal NI. Zairemmawii awmna Marpara North ni se,’ tih a ni a. Kohhran Committee rem tihnain biak ṭûl ang angte biak fel an ni a. Ni 9 (Thawṭanni) khân Synod Home Mission School, Marpara bang rawng hnawih tûrin kan kal a. Chhuah hmain Kohhran Chairman, Upa JHC Aichhûngan ṭawngṭaiin min thlah a, zîng dâr 7:00 vêlah Ramthar Chairman, Upa Laltharmawia leh Rev. J. Lalremsiama hovin kan liam thla a, a hlimawm hle a ni.

Dârkâr riat vêl zet hnuah kan tum ram kan thleng a. Pu Hmingthatluanga Kawlni, Headmaster leh a thawhpui ten min lo hmuak a, inhmêl hriattîrna te kan neih hnuin zanriah kan kîl ho va, a tihzia ngei mai.

8. Hna thawh dân: Kan thlen tûk aţangin hna kan ţan ngâh a. An sikul khu Nursery - Class VIII a ni a, a tê lo hle mai a. Rawng hnawih zawh hman loh a hlauhawm a, kan ţang tlâng viau a ni. Hemi tûk hian beisei aia zau kan thawk hman a, mak kan ti hial a. Chaw ei khamah kan chhunzawm leh a; beisei ngam loh puitu pahnih - Bialtu Pastor, Rev. Zosangliana Rokhum leh Pro Pastor Lalthansanga Sailo te an lo lang a, hna pawh a sâwt phah hle. Thahnem kan ngai tlâng a, tlai a nih meuh chuan hmaâk a zîm ve ta, a tûka chhunzawm leh tûrin kan chawlhan hrih a. Ni hnihna chu tûkthuan ei khamah kan ţan a. Eng emaw chen kan beih hnuah thawh tûr chin zovah kan inngai a. Thenhatin *waiting shed, dining hall* dawhkân leh thutthlêng te hnawih tel tûl an ti a, chu pawh chu kan zo thei leh ta. Pathian zârah harsatna awm lovin tih tûr kan hlen ta dêr mai a, a lâwmawm hle a ni.

9. Report tûl dang: Marpara North hi Chakma khua a ni a, mi 2,600 aia tam an chêng a. Buddhist sakhaw bia za zêla 83 lai an tling a ni. Synod-in zirna hmangin Chanchin Tha puan darh hna a kalpui mêk a, thawktu mi 20 vêl an awm. Sikul naupang 300 chuang fê an nei a, a zahve aia tam hi ringlo an ni. Zirtîrtuten an naupangte hi kêr khatah *devotion* tum li an neihpui thîn a; kum tin Gospel Week an hmang a, hlâwk an ti hle a ni. Anni bâkah hian Evangelist an awm bawk a, ringlote chu an inah lên chilhin an tîtpui a, khawlaiah te pawh Pathian thu an sawi mai thîn.

Kan ram chhûnga khaw pakhatah heti zât ringlo an lo la awm thei hi a veiawm êm êm a, ţan lâk tûlzia a Chiang Khawp mai. An khua khu a zau va, thawktute an indaih lo

vang tih a rinawm a. ‘Tam zâwk dah belha, nasa leh zuala seng khâwm hna thawh a tûl mang e,’ tih hi ngaihtuahna luah tlattu a ni. Lal Isua thuchah hnunng ‘Chanchin Tha hril rawh u,’ tih kha kan hriat nawn fova, chumi tihlawhtling tûra theih tâwp kan chhuah ho a tûl tak zet a ni.

Ramthar Committee thu rêl hlen a ni ta hi hlu kan ti a. *Work camp* chhûng zawnga min vênga, kal lam leh haw lam harsatna tâwk lova min hrulaitu kan Pathian hnênah lâwm thû kan sawi tak meuh a ni.

Liansavunga Chhakchhuak, Ramthar ziaktu

3.

- | | |
|-----------------|---|
| 1. Field | : Cachar Tlângram |
| 2. Khua | : Dolchhora Kohhran |
| 3. Tlawh hun | : Ni 10-14 March, 2026 |
| 4. Tlawhtu | : Armed Veng Ramthar Committee |
| 5. Kal zât | : Mipa – 21; Hmeichhia - 1 |
| 6. Tlawh chhan | : <i>Work camp</i> |
| 7. Hna thawh | : Biak in <i>varanda paver block</i> phah
leh Pastor qtrs. chhûng furniture siam |
| 8. Sum hman zât | : ₹2,32,147 |

9. Lâwmawm lam: Dolchhora Pastor bial hi Silchar Pastor bial aţangin kumin 2026-a indang thar an ni a, kohhranhote an phûr hle a. Bialtu Pastor hmasa ber hi Armed Veng Biala Pro Pastor lo awm tawh a nih avângin Armed Veng Ramthar Committee te *work camp* nei tûrin min rawn sâwm a; Ramthar Committee chuan tihhlawhtlin ngei tha a ti a. Tichuan, ni 10 (Thawhlejni) zîng dâr 6:00-ah biak in bul aţangin kan chhuak a, kan kal dâwn hian kohhran Vice Chairman, Upa Lalramthangan ţawngţaiin min thlah a. Bualpui hotel-ah tûkţuan kan ei thla a, tuang taka kalin tlai dâr 2:00-ah kan kal tumna, Dolchhora khua chu kan lût ta a ni. Missionary thawku chhûngkuate leh kohhran mipuiten min lo hmuak a,

kan lâwm hle; zanriah min buatsaihsak bawk. Riahna hmun tûr te kan tih fel hnuin sikul *building*-ah hmun khatah kan riak khâwm ta a ni

Ni 11 zîng kêr aţangin hna kan ţan a. Hmun thumah kan inţhen darh a, pastor quarters chhûnga *furniture* leh biak in kawta *paver block* phah tûr leh biak in chung rangva pawp thlâk tûr te kan insiam rem hnuin hna kan ţan chho va, nilêngin kan thawk a ni. Hemi zân hi kohhran inkhâwm zân a ni a, Nilai zân thupui zir lovin, sermon inkhâwm hun hman a ni a. Inkhâwm ţantu leh thu hriltu hi kan chanpuala an dah angin ţantu hi Nl. C. Vânlalhruaii a ni a, Ramthar Committee Chairman, Upa Lalhruailianan thu chah nung tak ‘A tih theih tâwk a ti a ni,’ thu Lal Isua thu sawi aţangin kohhran mite hian kan thil tih apiang hi tê lua, lian lua awm lo, kan tlin tâwk hi rawngbâwl nân leh Chanchin Tha hril nân a tâwk a ni tih kan ngaithla thei a, a lâwmawm hle.

Ni 12 (Ningani) hian biak in *paver block* phah leh pastor quarters chhûng bungrua siam ngaite siamin hna kan chhunzawm leh a. Hemi ni hi chuan Dolchhora Kohhran lam te pawhin kohhran hnatlâng an ko ve bawk nêh kohhran mipui te nêh hlim takin hna kan thawk ho va, nuam kan ti hle. Tlaiah kohhran hnatlâng zawng zawng te nêh zanriah chawhlui kan buatsaihsak chu kan kîl ho nghe nghe a ni.

Ni 13 zîng kêr aţangin hna kan ţan leh a, a tâwpna nî tûr a nih avângin hna thawh tûr chin kan bituk zawh ngei kan tum ruh hle. Ngawrh taka thawkin tlai dâr 4:00-ah kan hna tûr ang ang te chu tluang takin kan zo thei ta a, kan lâwm hle. Kan hna thawhah hian bialtu pastor te, kohhran mipui te leh keini, *work camp* kal te pawh kan lâwm hle. Kan kal lam leh haw lam te, kan hna thawh chhûng zawng zawng te hian tu mah inhliam leh damlo buaipui ngai kan nei lo te hi Pathian

vênna leh awmpuina kan chan a ni tih kan hre Chiang Hle a,
lâwmawm kan ti hle a ni

C. Zohmingliana, Ramthar Ziaktu

4.

- | | |
|----------------|-------------------------------|
| 1. Field | : Cachar Tlângram |
| 2. Khua | : Noxatilla Kohhran |
| 3. Tlawh hun | : Ni 17-20 March, 2026 |
| 4. Kal zât | : Mipa 23 |
| 5. Tlawhtu | : Kulikawn Vengthlang Kohhran |
| 6. Tlawh chhan | : <i>Work camp</i> |
| 7. Senso | : ₹1,24,240 |

8. Lâwmawm lam: Kum 2026 atâna Kulikawn Vengthlang Ramthar Committee-in kan *project* – ‘*work camp* neih ni se,’ tih chu Pathian hruainain kan tihlawhtling thei a. Synod Mission Board Project List 2026 ațangin ‘Noxatilla Kohhran hall ceiling siam - ₹40,000’ chu chhângin *work camp*-in kan thawk a ni.

Ni 17 zîng dâr 6:00-ah Upa Lalhmingliana nupui, Pi Rebek Lalruatkimin țawngțainain min thlah a, tuang takin tlai dâr 3:30 vêlah kan thleng a. Kohhranhoten zanriah tui tak min lo buatsaihsaka, kan lâwm hle. Kan hna thawh tûr kohhran hall hi kum 2024-ah *work camp*-a a ban leh *beam* kan lo zu chhûn tawh kha ni a. Zîng ațanga thawkin tlai lam khaw ên chhûng kan thawk thei zêl a. Ni 20 (Zirtâwp) chawhma dâr 11:00-ah kan hna te zo felin chawhnu dâr 1:00-ah a hmun kan chhuahsan a. Kawng lakah lirthêi lamah harsatna tēnau nei mah ila, tuang takin zân dâr 11:30-ah Aizawl kan thleng a ni. Kan hna thawh chhûngin thawktuten a țûl țûlah min pui bâwm a, hna thawh kan awlsam phah êm êm a ni.

R. Lalliantluanga, Ramthar ziaktu



PUNNA 2026

Sl. No.	FIELD	HAWN KUM	JAN-APR
I. HOME MISSION			
1	Home Mission North	1949	4
2	Home Mission South	1987	
3	Masihi Sangati	1979	493
II. NORTH EAST REGION			
1	Arunachal & Assam Mission Field 'E'	1991	23
2	Arunachal & Assam Mission Field 'N'	2016	14
3	Arunachal & Assam Mission Field 'W'	2001	18
4	Assam Mission Field	2008	4
5	Barak Area	1975	44
6	Karbi Anglong Mission Field	1989	27
7	Tripura Mission Field	1986	462
8	Upper Assam Mission Field	2025	18
9	Cachar Tlangram	2023	26
III. CENTRAL REGION			
1	Calcutta Mission Field	1988	237
2	Delhi Mission Field	1988	52
3	Jharkhand Mission Field	2008	122
4	Lucknow Mission Field	1999	3
5	Odisha Mission Field	2016	95
6	Patna Mission Field	1999	97
7	Siliguri Mission Field	1988	29
1	Cambodia	2010	2
2	Nepal Mission Field	2000	36
BELH KHAWM			1,806

RAMTHAR MAN PÊK DÁN



Bank Transfer hmanga pe duh tán a hnuacia Account Number tár lanah hian a pêk theih bawk e.

Account Holder : SYNOD RAMTHAR
 Account No : 10665621086
 IFSC : SBIN0007058
 Bank : State Bank of India
 Branch : Mission Veng

Ramthar man pete chuan an pêk veleh
 WhatsApp No. **8974694225**-ah inhriattir ní se.

Postal Regn. No. MZR/46/2024-2026

RNI Regn. No. 40889/88

RAMTHAR HLIMTHLA

**Asst. Coordinator, SMB & Area Prometer, SMB te zinna
(phêk 17-21)**



**Zomuantlâng thawktute nên
Thaidawr Pastor Bial**



**Rajiv Nagar thawktute nên
Tuipuibari Pastor Bial**



**Persang thawktute nên
Tuipuibari Pastor Bial**



**Marpara thawktute nên
Marpara North Pastor Bial**

If not delivered please return to:
The Manager
Ramthar Chanchinbu
Synod Office, Aizawl, Mizoram
India. Pin-796001

To,

*Published by Rev. R. Lalhmingsanga and Printed at the Synod Press, Aizawl
on behalf of Ramthar Association, Aizawl, Mizoram. Copies - 39,400*